



Jumat, 16 Pebruari 2024
Ogen: Masmur 90:12



Pentar Makeken Waktu



Ngenanami kegeluhen alu mehuli ras bahagia tentuna banci ilakoken di kune ngasup ngaloken ras ngataken bujur i bas kerina si reh ras jadi man banta. E maka perlu kal kita ngidah, natap kegeluhen enda i bas wari si pagi alu dem pengarapen. Alu pengarapen e me maka kita ngasup ras nggit erdahin, ngkelengi, ngalo ras mere la saja bentuk materi tapi keleng ate. I bas paksa-paksa e me kita ncidahkan ras nehken kekelengen man kalak sideban. Nina Nike Norton 'Hargai anugrah hari baru, jadikanlah waktu itu penting dan setiap menit adalah berkat.' Teptep paksa sibentasi kita eme wari simbaru, sabab langa pernah sibentasi janah paksa eme kita ngarapken erbage-bage simbaru ibas kegeluhenta. Amin kai pe sijadi ibas paksa si lepas ntah wari enda, arapkenlah maka wari pepagi terulin jadi man banta. E maka paksa-paksa e penting guna sipakeken alu mehuli sabap teptep detik, menit seh ku jamna e me pasu-pasu man banta. Ibereken man banta guna si nikmati alu dem pengataken bujur.

Bage me Pemasmur ngidah kegeluhen enda, Dibata me si ngaturken kerinana. Gelah payo carana ngenanami ras ndalani kegeluhen enda maka ipindona kepentaren gelah ngasup ngantusi erti kegeluhen enda. Kepeken gendek-gendek nge umur geluh manusia, ibandingken paksa-paksa nggeluh i doni enda. Adi labo bekas pengajari Dibata labo ngasup manusia ngertiken kegeluhen enda, labo ngasup ia makeken paksa-paksa e alu mehuli.

Kuga kita makeken kerina paksa siibereken DIbata sedekah enda? Enggo nge mehuli pemakenta, me labo mbue waktuta mentas bage saja, la igunaken alu payo? Renungenta enda mpersingeti kita, tetap erlarjar man si mada paksa-paksa gelah payo penggunanta alu mehuli.